

京邸集





序

長洲門人韓茨謹撰

上古之時徒有謳歌無文字雅頌之聲詩之名放  
於虞書其時命契教以人倫而卽命夔以詩教胄  
子禮之言負子也曰詩負之詩之爲言承也然則  
承君臣父子兄弟夫婦朋友之教而負之以持于  
世者也蓋夔契之職相須矣孔子錄詩三百篇皆  
緣人倫而作而其逸詩之散見他經者亦皆切于  
世教可歌誦古人之作其立言而無裨者鮮也世  
衰道微言志依永誦美箴過之義多闕而徒費于



辭以爲工不風不雅日以煩靡于先王之本教屢  
有合焉者不多數而離之者多矣吾師仁和邵先  
生能明且行於先王之教者也孝于事親友于舅  
弟門內之行無弗摯也所歷官皆恪勤自將弘濟  
斯民而罔不造于多士在

講幄尤以經術自發舒而以其間作爲歌詩託諸山  
川草木蟲魚流連物類之言以寫其溫厚和平篤  
于立本之旨今讀京邸集如干首有夙夜匪懈之  
誠焉有蓼莪劬勞之痛焉有鄂不之愛焉有味且  
之勸戒焉有鷄鳴風雨之懷人而繾綣焉蓋實有

負之而持者豈徒作者哉蒞于及門無能爲卜氏  
之徒而辱先生之授以是集也竊自喜得與聞詩  
之末故輒疏其大凡而附于小序之義例先生使  
粵時唱酬甚富蓋登高能賦山川能說固先生之  
才而所寓託亦多征夫靡盬之義別爲集以行世  
云



自序

詩吾家世學也先弘齋公著弘藝錄所載古近體詩三十餘卷久行於世而菟苑原機一卷揚扈風雅鼓吹百家論者謂方之鍾嶸之詩品嚴羽之詩評殆有過焉先君詩史一編貫穿鈎穴稱少陵功臣遠幼數聞庭訓心竊嚮慕之然方束於舉業家言不敢旁有所涉戊戌下第南歸始畱意篇什甲辰以後索米長安時間作詩亦未計其工拙十餘年間詩無可存者乙卯視學江右眺匡廬浮彭蠡登臨之暇每多爲詩歌以抒寫性情胷中浩乎似



詩存  
有所得而會迫簡書歸未抵里草稿委做篋中不以自隨尋亦散佚故數年來詩又鮮有存者迨已未再入承明距今五載其間紀恩述事以及時序旅懷倡訓投贈之什往往而有今春病餘長日支枕無聊悉檢舊稿出之稍加汰存以識歲月因顏之曰京邸集噫嘻予才既不逮古加之學殖謏陋而詩又多得之應酬輻輳之餘其抱慙先人實甚顧敢覲然以詩名耶然則是編之存亦聊以存吾拙并自媿所不能者類如此道云爾倘天假之年得以上溯漢魏近涉唐宋諸家沿流尋源畧闕作

者之藩籬以庶幾家學之萬一是則余之所有志而未逮也夫

康熙甲子春日西陵邵遠平戒山氏自識於京邸



戒山詩存

京邸集

西陵邵遠平橐

己未五月改官後作五百字

詔下金華門微臣意悚息復臣柱下班授臣太史  
職臣生樗散材再三濫此席憶昔釋褐初謬通金  
閨籍肄習勤六書校讎到點畫墳典闕石渠藜火  
照四壁本乏侍從長旋散彤墀直瑣細領度支錢  
穀試周歷簿書雜還來頗亦耐煩劇中間會纂修  
謨烈紀功德撰述二典文若稽古帝跡金石爛鴻  
辭葑菲預采擇未竟著作林遂簡輶軒役校士來



西江弦歌出鋒鏑講學戎壘間秉鐸鼓鞞側仗茲  
華節行得際休明曆禮樂果銷兵泮水有餘澤掄  
材遍薪樵淘汰及珠礫文教所蒸濡腐儒生羽翮  
人生赴功名勲業豈翰墨由來賤雕蟲許身慕益  
稷謬司蒸鑑衡無裨潤色益猥蒙異數榮報最三  
載績月卿有超階就邸備列棘豈意巨紘開瞳矐  
下朝檄復用待詔徵再趨北門掖干羽會昌時九  
殿剖弘璧塊獨抱陋軀螭階步盤躡還升玉堂署  
出入辨閭闔龍沙鬱成隄華棖蔭文碣亭就瀛洲  
懸水向鳳池覓老槐旣盤行長松轉深碧偃仰修

吉堂書史記狼藉舊遊晨星稀後起翹薪積鈴院  
省曩踪花磚視日色此地稱木天去 帝在咫尺  
棲梧鳳數飛鳴霄雀幾隻凡羽不敢窺一墜永乖  
隔風沙縹澹澁杳若失羣翼詎謂墮雲影重見躡  
華鳥一出理不還再來已難得何期邁際會清華  
許三陟敝帚屨沐升鈍鋌被拂拭屢登史館筵飽  
餐大官食恩數絕無兩稱報懼莫塞揮毫恧三長  
謀野無一獲陳力虞曠官研文庶華國 皇運適  
開泰浹日有苗格洗眼見唐虞鞠躬隨旦奭鷄鳴  
踐九衢結綬並輝赫



忌月紀哀 有序

余癸巳喪母在歲之二月時方弱齡窳窳未能盡禮甲辰以後畱滯金門先君七月壽辰稱觴遙隔五月蒲柳賤且復以闕於承顏存歿兩阻坐是傷心每屆茲三月戚焉不樂屏撤甘旨竟月無改迨奉迎先君來邸色養未幾遽抱終天易簣時爲戊申之五月十二日去賤揆僅十日餘撫躬追痛彌切哀思他人忌日余獨忌月良以此爾自服闋補官至今周紀值二五兩月側

席思憂僅啜蔬食率以爲常今年重入京邸又逢五月哀感交集爰賦此章

伊余夙鮮依十七喪吾母疾風摧萱花惟時月在  
卯叶陽春無偏頗哀哀泣雛鸚二十歌鹿鳴公車  
再北走濫竽南宮薦千金享敝帚待詔滯金門索  
米不得負九京隔慈顏甘旨違將父念茲兩躊躇  
中心怒如擣叶京邸遠迎養微祿沾升斗庶幾慰  
生存黽勉供漚滫傷哉風木悲承顏苦不久日在  
鶉火中山頽梁木朽苦塊覩偷生微軀亦何有嗚  
呼獨匪民跼躄慙高厚君子終身憂忌日良有取



鄙人獨忌月二五兩不偶瞻依永訣絕蓼莪化蒿  
莠矧茲初度日正在擗踊後坐念我生辰生我者  
在否一月兩懷并欣戚雜交揉明發懷二人每飯  
不能飽叶蔬食聊備糜芻豢詎悅口人生罔極恩  
欲報苦不早叶視息人間世中腸日繚糾欲哭強  
吞聲積血迸一嘔

郊壇禱雨甘霖立沛擬應制二十韻

聖化原時若驕陽亦偶愆殷憂勞午夜祇祓戒庚  
先六事何哀痛羣工盡吉蠲若盧寬禁網時有詔卹刑  
便殿撤宮縣夙駕鸞輿出無煩警蹕傳玉繩低碧

漢瑤月澹蕭煙肅事郊壇闕帷宮緹幕偏白茅陳  
燎燿蒼璧奠牲牲呼吸原通座精誠已徹天雲隨  
華蓋合珠濺御衣圓觸石纔膚寸爲霖遂八埏赤  
光馳列缺黑蜨出重淵閤道霏煙迥天衢新溜潺  
如絲初散漫作解漸連綿苑樹霑逾翠林花濕更  
鮮桑麻欣潤野楚麥藹交阡孚格看如此天人理  
固然天喬咸茂對跂螽總生全會獻嘉禾頌先賡  
喜雨篇微臣叨載筆玉燭記登年

入史館

承恩仍許侍金閨珥筆重燃太乙藜正直虞階干



羽化得陪阿閣鳳鷄栖天文象共瞻雲漢聖世光  
應暎璧奎三入承明真曠遇更紬石室備叅稽

送丁雁水分巡贛州

憶昔同官領度支新持使節向天涯咽喉要地宣  
猷日閩粵南天罷戰時水落贛江開遠望山高庾  
嶺坐題詩幾年舊事縈懷抱美爾勛名遂所期

送古燈和尚南還

去住關何事相逢亦偶然可應還面壁底是不畱  
燕瓢笠青山夢詩篇白社傳雲中有孤鶴刷羽入  
南天

南康守倫宣明述其先人遺命慨然有作

忠孝詎一轍有時不兩全居常貴守經處變乃達  
權烈士懷苦心易簣念時艱遺令戒其子在三誼  
勿諼七尺旣許國食祿遑避難慎莫拘小節努力  
事戎旃辭嚴義亦正摯性諒所安音微寄百世汗  
青光照顏

賊圯自江介橫流日胥淪拂衣豈不芻况可全天  
倫奈何迫治命大義兼君親灑血誓徇國微軀安  
足論墨纒登城陴懦夫氣益振封疆磐石固仗節  
何嶙峋成忠實全孝拯溺賴仁人上書奚所控臣



心多苦辛

擬觀稼應制二十韻

帝心勤省歛清蹕御鳴鑿鳳吹開馳道雲旗擁從  
官西郊迎彩仗南陌迓青鸞豹尾爭陪輦熊臣各  
據鞍王畿千里遠黍谷九秋寒粳稻霜風茂根芟  
湛露溥方苞何纍纍既實自攢攢菽蒡青如帶秔  
香馥若蘭平疇交翠藹彌望總琅玕無逸民依重  
雙岐嘉穗繁鳥耘虞甸易粒食禹功難法駕行方  
至天顏穆以歡芄芄迎舜日或或動堯觀拜舞  
羣稱壽歌謠盡染翰登三真有象餘九喜同看爽

道窺隆準提壺盛饁簞迴輿勤武事于貉及秋殘  
七萃鸞鳥號三驅獲野獮詞臣誇羽獵聖德豈  
盤桓盛世遺賢少還聞訪釣磻

重葺健松齋爲方渭仁編修作

達人遺世榮含情絕塵迹舊業始寧墅植援同謝  
客結構池上齋彷彿柴桑宅鳴琴置丘中竹色晃  
虛白軒閣四望通遠山入几席時危邁板蕩室廬  
延火烈避地歸去來長物一無挈獨向白嶽游許  
園載松栝五粒如縣針亭亭歲寒碧翳彼偃蓋乖  
愛此磔砢節一日三摩娑神氣相慰藉謾謾風濤



言本  
聲選句標題額重罹震隣恐奔竄咸辟易萍梗逐  
風潮旅泊淹歲月比歸灰燼餘典型已過隙申池  
竹木焚此松辭翦伐已喜勁節存還感遺手澤道  
情自緬邈神理方卓越高懷溯曩賢仁孝景時哲  
西闈有清風自此常不沒

施愚山遺敬亭綠雪茗率成短歌

長安秋來三日雨銀竹森森溜如注城中水味常  
苦鹹滿貯罌甌勝山乳故人恰遺佳茗至錫瓶細  
題綠雪字旋添活火發新泉色澄香澹吹蘭茝徑  
山顧渚真衙官團鳳小龍僮父耳紅玉花瓷飛雪  
一條冰  
輕一甌睡足何騰騰朝叅縱嬾詎足怪頭銜喜暑

送韓元少及門歸吳閫時以遷葬予假

十年詞賦竝鄒枚千里秋風客思催木脫燕山鴻  
雁到人歸吳苑菊花開君親去住情同苦師友臨  
岐首重回自是 聖恩深侍從更封馬鬣慰泉臺  
次見南歸書示二首

正是驚搖落悽然汝又歸黃花羞短髮白露念征  
衣到日填篋好經時萊綵違詩書須付託裘馬漫  
輕肥



百端忽交集送汝一長歔馬鬣松楸冷牛衣涕淚  
餘薜蘿三徑在煙柳六橋疎何日抽簪去田園賦  
遂初

與裘敬亭夜話

巷南卽子居屋宇隔跬步念我數能來披衣慰情  
愴剪燭坐夜涼秋氣驚已暮墜葉鳴空階乍疑疎  
雨度開簾見明河始覺聽聞誤坐久主賓忘談深  
胷臆吐意氣我輩看相期垂竹素

寒月獨步

枯林吐寒月庭際空烟霜高齋不眠客攬衣循東

廂陰蟲寂餘響朔雁仍孤翔微微青燄冷耿耿宵  
漏長流光照我影脉脉睇河梁

喜家眷至二首

越水秋帆遠燕山木葉摧書從前月到人自故園  
來驛路程頻計高空雁獨迴今朝成一咲懷抱好  
全開

骨月經秋見風霜道路難關情小兒女絮語雜悲  
懽枝鵲眞成喜釵蟲巧耐寒尊前今夜月不異故  
鄉看

武闡掌卷



彤庭肅穆繞旌旗  
羆虎南廂較士時  
萬國英材爭貢藝  
九重神武自臨墀  
風生熊的穿楊遠  
光動龍韜對策遲  
頗牧聖朝方側席  
登壇勛業正堪期

其二

雉尾雲開晝漏清  
文衣吹鳳敞延英  
縱橫武庫羣材集  
璀璨文昌上將明  
禁裏握奇歸廟筭  
期門奮武震先聲  
自慚珥筆虛陪從  
麟閣何由勒姓名

禁中夜宿

地分清切日華東  
紫霧和煙靄禁中  
天濶苑鐘聲淅瀝  
月寒宮樹隱朦朧  
條鈴午夜無傳使  
金掌秋

風有去鴻南顧

至尊仍撫髀  
卽今燕領更誰雄

送周緘齋還錫山四首

秋發驪駒不可留  
千山紅葉點征裘  
君王豈少金莖露  
消渴文園自倦遊

督亢陂前木葉暝  
桑乾河外雁紛紛  
秋風何限葦鱸興  
惆悵明朝更別君

九龍山作九芙蓉  
知爾高栖第幾峯  
試踏漪瀾堂畔路  
青杉白石水淙淙

請急恩深侍從臣  
春暉堂上綵衣新  
惠山泉石能高臥  
可憶金門索米人



庚申元日免朝

時以地震後復會殿災故免

元日歲涸灘條風始溶漾  
至尊穆清居恭默羣  
工仰不聞臚句傳詔放閣門  
仗憶昨相月初秋氣  
澄沆碭忽訝坤軸翻似驚雷車  
壯大厦摧拉擺青天蔽塵埃  
是冬會天災心味驕炎亢偶失  
梓慎占未戒采恩煬我

皇堯舜資恭儉文景上變異亦偶然  
宸衷佇惻愴罪已三言誠責躬  
六事做減饈與撤縣側身慰羣望  
天意已感孚兢業久未忘小臣被恩慈  
再總金門鞅珥筆媿尸素何以答景貺  
願言斟堯尊燮理望

六相

贈馮再來少司寇二首

天台名山宗華頂高百越霞標接層雲  
瀟灑石梁月異姿乃挺生擢英何勃發  
翩翩虬龍性獨秀鸞鳳骨長風蕩萬里  
振衣入窮髮孤踪渺天外高舉何超忽  
天眷不遐遺相將向北闕貳長白雲曹平  
反克慎罰憶昔共賢書貞心勒珉碣  
女蘿托青松願言無剪伐

滇南越天末志乘苦闕畧相如絕麗才不聞  
俊筆削近代揚用脩聞見頗閱博滇程蒙段記亦復恣



研索上古迄今茲未能悉誦度先生好著書述覽  
窮幽邈編輯紀瀛事亟推大著作文詳事亦瞻信  
史良有託別錄表遺忠闡幽意不薄大書與特書  
後來免躡駁我徒仰視公真同雲中鶴願言時談  
諧心賞縱磐礴

慈仁古松歌

前年屢憇慈仁寺古松蒼翠流雲氣高枝偃蓋撐  
晴空低枝攫挈捎厚地青天忽詫蛟龍蟠赤日只  
疑風雨至今年重到慈仁來蒼皮剝落枯幹摧一  
株已遭斤斧伐一株僅存神鬱屈倔強尚與夔魍

爭愛惜或愁雷雨拔其餘四株稍葱蒨青青翻是  
尋常質我聞此松植自金元年胡爲摧折荒寒烟  
爲爾摩挲屢延佇嗟爾託根原失所慈仁寺中大  
作集寺門日日飛塵土珠玉錦繡走黃埃日炙風  
霾氣悽苦孤根不免螻蟻穴勁骨寧能駟僧伍君  
不見廬山簡寂觀高松千尺飄霜霰白鶴兩兩巢  
其巔仙人羽客時相見又不見天台橋畔松作鱗  
之而蒼蚪龍銀河倒掛玉濃濃樵斤獵火何由逢  
吁嗟乎人生位置有如此上馬出門暮山紫

高念東夫子同遊萬柳堂和韻四首



調元今相國近郭有茅堂地僻車塵少春來柳帶  
長亭臺占位置魚鳥足沉翔却喜招尋約相將禁  
苑傍

耆舊高夫子園林綠野堂登臨隨杖履晝漏正舒  
長鳳闕瞻雲近蚪松映日翔廟廊多燕豫連轡小  
山傍

和風吹緩緩短策去堂堂嘯咏情何適追陪興自  
長春光已駘蕩暇日許翱翔萬柳初含綠山厓又  
水傍

當年廉孟子曾記讀書堂楊柳何如昔遺風迥自

長雲烟仍護惜鸞鳳幾徊翔共識經綸意春陰滿  
道傍

再和原韻四首

何處散幽情城隅復曉行未消春澗雪已變候禽  
聲薄靄收殘霧微寒避早晴流連師友意轉覺馬  
蹄輕

勝侶共幽情長吟坐復行寒餘流爽氣靜極響春  
聲浩蕩孤雲過蕭疎萬樹晴渾忘在京洛塵累一  
朝輕

真復得移情幽期愜此行疎林連野色啼鳥雜溪



詩在  
聲北極垂天近西山拂檻晴乍聽高唱發縹緲玉  
簫輕

交遊自有情攜手快同行倚樹聞天籟聽鶯愛友  
聲亂雲三徑暗斜日半軒晴欲去仍畱戀良游洵  
未輕

送程公引郡丞之杭

薊門驛路雙畫旌春風遙指錢塘城都人動色喜  
相告江郡得借名賢行名賢自昔推伊洛存心弘  
濟傳家學登車攬轡慨澄清利器真堪別盤錯行  
時爲我停高軒意氣相逢樂盡言越水吳山古都

會地瘠人貧生聚繁邇來鞀鼓震鄰境伏莽游魂  
還未靜又復三年悲亢暘千村萬竈荒煙冷沉吟  
感嘆借前籌撫循保障當何由但矢誠心茹冰蘖  
不介以孚奚更求况今重臣多 帝選建節東南  
經濟展制府揆文奮武才中丞德意仁聲顯分藩  
秉憲多大賢每敷政教思惠鮮民愚俗樸古易治  
能使下令如流泉郡中司馬官尤亟戢兵弭盜皆  
其職如憑舟楫濟大川神君來暮歡何極吾家一  
廛城之西北天遙望南天低竚聽衢歌起四境政  
成會與龔黃齊



盆榴

蕊苑盆中榴熒熒映凡戶幹纔三尺強根依數寸  
土時至耀光榮頰萼粲可數瑣細朱纈攢歲蕤絳  
苞吐露葉碧含滋嫣紅鮮過雨盤盤綠雲鬟火齊  
紛綴縷照眼句還成步欄屐屢佇惜哉果不碩蟲  
蠹類齒齧不見金谷園脩柯兢磊砢赤燒延高空  
紫房羅賓俎雨露詎有殊植根貴得所

苦熱行

赤帝起鞭六赤龍炎官火繖張當空原燎噴薄何  
彤彤區寓鬱烟如甌中長安毒淫增煩忡歎陽翁

熱蒸簾櫳層氷山堆不快意平頭大扇嫌纖風長  
安客舍百不作箕踞科頭竟日坐水晶盤浸葡萄  
空碼礪盃沈氷李大拍浮肯顧尚書期襍穢只愁  
熱客過忽憶前年當六月匡山絕頂涼飈發谷底  
長松激翠濤半天瀑布吹飛雪夢遊不到五老峯  
玉峽簾泉勞結惜我家舊住西湖邊垂楊掃拂蘇  
堤烟玻璃千頃風清漣越女羅衫嬌采蓮荷華菱  
葉鮮可憐胡爲執熱煩憂煎會須晞髮西湖去扁  
舟把釣弄潺湲

擬初唐律詩四首



沈佺期紅樓院應制

紅樓緝宇逼宸宮，祇樹葱青出九重。  
禁裏經聲聞晝漏，壇前幢影動疎松。  
雲依御幄長疑鷲，氣接爐烟總似龍。  
何幸微臣叨侍從，三車聽演日從容。

宋之問春初幸太平公主南莊應制

主第樓臺灞漭隈，朱旗玉軼早春來。  
香風欲度花疑雪，輦路纔青艸似苔。  
天仗盡隨金埒轉，簫聲故遶御筵迴。  
何須更訪支機石，扈蹕親從銀漢回。

韋元旦典慶池侍宴

龍首疏渠枕帝州，鳳池滉漾接瀛洲。  
南山倒影空

青動北澗晴光艸，樹浮苑外霓旌環羽騎。  
花間錦纜引龍舟，擢歌簫鼓中流激。  
不羨橫汾漢武遊。

張說同蔡起居偃松篇

孤松北闕接峒嶺，巖巖黓黓參天黛。  
色遙雲近苑墻浮，翠蓋露分金掌浥。  
蒼條枯虬夜暗驕，鱗鬣清籟晨疑和。  
鳳簫不羨秦封駐，仙蹕願承霄漢挺高標。

讀漢史雜感十首

董子王佐才，漢儒疇能伍。  
下帷授春秋，三策天人舉。  
侃辭折驕王，經術啓漢武。  
鄒魯久荆榛，茫茫尋墜緒。  
正誼與明道，卓哉醇儒語。  
轅伏諸老生，遺經



詩存  
守訓詰枚馬僅雕蟲瓊細不足數中壘有篤論廣  
川亞伊呂

王孫昔未遇垂釣清淮淝晨炊亭長欺帶劍少年  
嫚漂母哀進食竟漂申繼綫歘起攀赤龍英風掃  
垓甸破趙摧燕齊指揮速雷電功成爵真王麾纛  
入里開千金酌母恩茲事垂簡汗報施亦區區末  
俗良可歎風塵中有人胡爲吝一飯

神龍何天矯詘伸固隨時達士赴功名藏用或委  
蛇賈生洛陽少卓犖伊管資英英露鋒穎銛如脫  
囊錐立談輒痛哭母乃非其宜絳灌與東陽羣毀

成瑕疵幽憂弔屈賦瀟灑鵬鳥詞才大惜量小狷  
忿蚤自摧老氏有遺言知雄貴守雌

汲井當汲深藝田當藝稷古來賢豪儔富好行其  
德瑣瑣競錐刀擁貲徒自殖子長幽縲繼家貧贖  
無力俛首就宮刑千載猶心盡當時漢公卿胡乃  
坐塞默晏嬰鄙陋人解驂脫越石欣然慕執鞭茲  
意良憤激所以貨殖傳終篇三太息

季布尚意氣然諾終不移條侯急劇孟顯名吳楚  
時朱家活豪士排難或用奇制行非中軌義聲未  
可疵如何末世士齷齪徒自爲規行復矩步禮法



相拘持禍患歛手避勢利互傾危緩急固時有叩  
門以親辭因茲重感慨折節事哀絲

種蘭莫傷根傷根蘭不芳種樹莫披枝鬱鬱蔭道  
傍于公治獄平陰德後乃昌駟馬高蓋車驗若左  
券償列侯尚公主閭門何輝光溫舒及五族郅周  
亦離殃倚伏有固然慘酷行自戕爲德豈責報君  
子道其常

貢禹治公羊守經據古義再徵列三公上書革奢  
侈水衡減肉獸角觝亦罷戲劉向受穀梁校書領  
中秘永始元延中凱切陳封事洪範著天人梓柱

推興廢經明行逾修侃侃直聲遂彼哉匡孔儔儒  
術止逢世

師丹骨鯁臣諤諤定陶議廷論務訛訛骸砥柱中流  
峙大哉萬古經人後爲之子羣咻紛謠詠詔收徹  
侯璽身退義不刊正辭植人紀易世乃褒榮令名  
垂青史

嶢嶢乃易缺皦皦乃易污珠以抵鵲隕蘭以當門  
鋤東漢尚氣節標榜高顧厨危言與覈論過激成  
旤樞刊章急鈎捕黨議遂紛挐吾慕郭有道身泰  
名亦俱處貞不絕俗用晦能全軀詎曰非明哲悠



悠千載餘

太丘稱道廣篤行良恂恂枉弔類濡跡署掾含垢  
辛全宥及善類履尾不啞人大直固若屈流風薄  
夫敦二方既承則八慈亦繼塵爲善宜有後楷模  
及人倫

棣萼歌爲慕見滄樞部作

中丞建節臨三吳名駒汗血來天衢冠珮接武中  
朝趨長公典司金虎符次公載筆承明廬城南尺  
五巷陌殊各開第宅徑路紆退朝入直嗟岐塗庭  
花璀璨當春敷榮悴感嘆荆三株翻然相就并室

居墳唱箎和悅且愉晨趨丹陛聯騎驅散朝並轡  
日未晡案頭握奇黃石圖風雲指顧來須臾響榻  
絹素列兩隅秦碑漢隸鍾王虞往昔才名推兩蘇  
宦轍阻絕悲江湖同朝兄弟亦不無其誰晨夕長  
燕娛弟也有兄行相扶一夜十起不言瘖同根連  
氣樂友于流風足挽頽俗瘡讓宅應咲前人愚  
原無煩永嘆吁爲歌棣萼揚華

送勞書升督糧貴州四首

往余于役江右正值戎馬縱橫書升賦詩  
惜別情事黯然比來京邸會書升亦以視



學山左使竣還都良晤無幾旋奉黔南之  
命與余曩歲時地正復相同漫成四章以  
酌夙雅兼識別緒

海岱譚經後黔南更遠過便應蠻土俗并作魯絃  
歌金筑猶傳箭銅崖漸偃戈莫言遷地僻猶是古  
牂牁

戰後驅車去曾憐賦遠行我辭豫章路君又夜郎  
城宦轍推遷易征途歲月更轉輸今最亟勿謂一  
官輕

此地雖荒服名賢記昔時競傳司馬檄仍有伏波

祠清望時情屬通才國計資簡書原鄭重肯負廟  
廊期

獨有天涯隔能無悵別情同官十載事邊徼萬山  
程已閱炎涼久何勞感慨生舊巢還待汝珠樹露  
華明

題畫八首

秋色連遠山鳴泉入寒牖借問支願翁得無漆園  
叟

懸崖落瀑布吹沫欲沾衣還愁風雨夜化作玉龍  
飛



湖漲曉煙浮漁艇煙中宿欸乃一聲殘煙消湖水  
綠  
山晴翠如黛山霧濕如鬟總輸春夜雨潑出米家  
山  
空山蘭若逕時有樵犢逢古栢亂蒼靄深林遲暮  
鐘  
冥冥暮煙迷白鷺立沙渚鳴榔何處船帆帶洞庭  
雨  
積雪壓溪橋梅花開幾處驢背苦吟人應爲探梅  
去

飛瀑三千尺泉聲六月寒匡廬奇絕處今日畫圖  
看

相看又見歲華新和孫岷瞻學士韻

相看又見歲華新聯珮朝來謁紫宸碧殿朱旗交  
羽仗銀幡綵勝競芳辰春風幾夜回珠斗草色千  
門近玉津會有堯尊斟白虎坐聞天樂動韶鈞

其二

相看又見歲華新漸水韶光憶此辰雪壓孤山梅  
盡放風吹湖岸柳微顰誰家幡綴金花巧何處香  
浮玉凍春恰喜帝京親串在朝回酒醖未辭頻



述祖德詩一百韻

豫章蔭百畝本根託坤垠黃河納九曲星宿來崑  
崙小子尠聞見祖德思淵源絳一恐漏萬掇拾粗  
具陳吾宗肇分陝得姓自幽燕故侯秦東門瓜瓞  
何芊綿五色引脩蔓漢唐代發聞嵩洛鍾靈瑞亢  
宗得名賢始祖康節公宋儒孰比肩精微穿月窟  
奧窅躡天根淳祐秩從祀聖廡俎豆虔子文念世  
亂夔峽家屢遷淵清官侍制靖康屬南轅始占姚  
江籍築室長子孫姚江吾大宗幹碩枝實繁庇族  
聚衡宇牖牖指數千詩禮甲於越纓組世蟬聯維

六十九公武林派始分遷居當元季贅壻依於錢  
四傳守恒翁抱朴含其淳勤生樂施予矩步遵先  
民五傳大峯翁學問兼天人鈎考貫經史象緯明  
星躔專門自毛鄭箋註陋魯韓門下多高第戶屢  
日駢闐親見五星聚家聲謂當振才大竟未展數  
奇徒逡巡種學後乃獲遺經付喆昆遂啓弘毅公  
大儒兼名臣憶公釋褐始嘉靖初改元興獻大禮  
議杖戍日紛紜永嘉枋國是炙手勢絕倫會公使  
荆南繼之罹內艱遇事每搯擊憤激久未伸服闋  
官比部忠誠積逾堅永嘉適再召侃侃批逆鱗疏



入逮詔獄拷掠就輿復雷霆殷白日虎豹磨齧  
巫咸誰爲招帝居隔九閻自分骨月糜幸邀斧鑕  
寬臣某罪當誅更生良國恩赭衣行就道荷戈瘴  
海濱投荒四十載不朽志立言寒暑却爐扇校讐  
益苦辛弘道溯鄒魯弘藝富詞翰弘簡繼通志貫  
穿三千年公所著三弘集凡六百餘卷久鏤板行世再逢金鷄赦未放  
逐臣還徒歸華表鶴暝就玉泉窰同時泉厓公通  
籍相後先棣萼輝連枝雙鳳名里門兄弟相繼成進士邑人重  
之名所居里兄當遣戍時洒泣摧心肝慷慨請身  
日雙鳳坊代急難心炯然及爲成都守無媿清白傳文翁有

遺愛星亭勒貞珉

蜀人爲刻去思碑於德星亭

吾曾裴菴公孝

友先諸舅徒步走闕下瀝血訟父寃三上始見省

有詔還故官陰霾散白日回光燭覆盆九原詎可

作庶幾慰忠魂忠孝萃一家世德光鳳麟

前明隆慶間當

事爲建麟祥鳳彩坊今存

星河實吾祖懷抱何溫溫壯歲薄雕

蟲濂浴探道原鍵戶手書卷不闕闐闐垣壽躋大  
耄餘高標託松筠嗚呼先天夫砥行儷璵璠著述

擅大雅姓名登詞壇十上不見售浮沈鄉校間積

學名實茂躬行仁義存樂善名其堂垂教良已勤

研精著詩史手澤久未湮

先君所著詩史四十卷藏於家

遠也奉



庭訓薄植藉陶甄提命日三省厄窮守一編俛仰  
事如昨念之涕洟瀾膏沃光彌爍積厚流益縣五  
世事咕嗶鷓鵬各騰騫延澤迨渺躬發祥固有因  
自媿腹背毛謬託排風翰三入承明席濫竽侍從  
班 聖恩實高厚日夕懷冰淵分踰懼德薄識淺  
忌名尊繩武志未逮繼述遑自安孳孳勉爲善矻  
矻窮丹鉛旣念恭桑梓彌思敦睦媼側聞父老言  
風俗吾宗醇曩時聚族居長幼同恂恂家風傲萬  
石德星亞荀陳父兄善誘掖子弟各謹馴歲時及  
伏膺跪拜情亦親自從喪亂後變故難具論舊居

旣蕩析素封或憂貧禮教漸流失習俗多佻儇乾  
餒積愆怨角弓愁翩反錐刀賤縫掖高閣束丘墳  
撫事三太息嗚呼曷以云吾祖誠大賢式穀良獨  
難詩書澤苟替九京增汗顏黽勉忠與孝會令薄  
俗敦願言各努力庶俾堂構延吾詩雖覩縷質語  
不可刪明發聊自警書此當書紳

白松歌爲房慎菴侍御賦

雙松天矯祠前植高柯古幹排雲直夜深時作風  
雨聲歲寒長抱冰霜色行人下馬客低徊烟沙日  
夕吹黃埃千秋共識貞靖節兩樹正拂氛霾開虬



龍攫挐虎豹慄貞靖先生鶴歸日山川如昨歲月  
非孤忠凜凜風蕭瑟

貞靖先生為慎菴尊人官樞  
部明末值寇亂靖節于家

候 輓恭紀

蒼茫白霧滿燕山虎旅宵嚴出九關仙仗悲風號  
象衛瑤臺缺月慘龍顏六宮尚想睢鳩化三島應  
傳駕鶴還輦路含悽鵠立久侍臣清泪濕衣斑

宿沙河

古驛沙河近春風花絮香地連三輔紫塵壓九邊  
黃向晚停征騎遙峯麗夕陽馳驅總王事勞鬢媿  
星霜

過三河

風塵猶赤縣井屋古三河戍接黃花迴春回白雁  
過疎林出睥睨羸馬陟陂陀東望 皇陵氣雲成  
五色多

望盤山

馬首見盤山百里亘蒼翠遠勢數峯出近形千嶺  
會是日天氣清了了明向背或簇如列仗或昂如  
紫蓋或如羣僊翔或如五老大含景類染丹空青  
若凝黛高俯滄海流近與碣石對引領興飛揚竦  
觀神愕眙咫尺阻躋攀勞鞅媿埃壻安得凌丹梯



臨風嘿長嘅

薊州

薊門古雄鎮突騎漁陽勅右臂拱陵寢左輔環神  
京我來一延軫都會廣以閔闐闐盛絲縞虎豹屯  
連營藿肉溢漿酒華轂影長纓自來遊俠地蹋鞠  
吹竽笙昔聞李將軍乘障來此城射虎石飲羽日  
落黃雲平懷古一慷慨大漠悲風生

龍口

兩崖忽中豁雙流會龍口勢若趨朝宗濊濊決清  
澗此中閔陵宮百神自奔走王氣何鬱葱山勢復

蚺鰐左右龍虎盤空曲熊羆守羣帝時來朝駸麟  
倚北斗翠旂與金支飄飄互先後制豈霸陵營鼎  
卜橋山壽小臣祇于役仰瞻肅稽首玉曆萬斯年  
弓髯茲不朽

寶坻杜相國以扇索詩敬呈四首

黃閣師臣重昌時泰道開袞裳明藻火鼎實和鹽  
梅舊學畱元老崇階列上台經綸今日事浩蕩正  
雲雷

梧掖傳孤直彤扉納衆流自因時地異總爲廟廊  
謀薄海氛初息長河浪盡收裁成功有屬真足繼



伊周

併蒙無不到每體好生心就日人皆樂回天意獨  
深恩教遍遐邇澤并及飛沉已識于門大徐聽駟  
馬音

下士風何邈驚看握髮頻祇今開閣日常有吐茵  
人幸許親函丈時容奉後塵可能樗散質終不負  
陶鈞

聞粵東使命

五月乘輅使初嚴嶺外裝鯨鯢方徙穴羔雁遂成  
行樹暗枕椰雨風清瘴癘鄉誰言萬里遠文教及

炎荒

辭家

君言元不宿拜闕卽辭家暑驛飛征蓋青山映曉  
霞都人看彩節使者問皇華屈指歸來晚天南道  
路賒

元夕後二日抵家

改歲燈初罷投家日又西輕車尋巷轉舊馬入門  
嘶筆硯塵須浣書籤散未齊春衣方可試休息更  
招攜

喜徐健菴過話

寺字

京邸集

三



詩在  
下馬征衣未拂塵尋聲索面有情親探懷依舊經  
年字握手初歸萬里人氣並芷蘭論臭味交容蘿  
蔓託松筠長安賓客多徵逐得似心期共酒醇

遲歸三日不得與昇平嘉宴恭賦一章用紀

盛典

皇帝二十又一年正月上元先一日一十四歲堯皆  
奠三百六十周官秩維時寓縣重昇平聲教東西  
朔南訖萬里車書銷甲兵兩階千羽舞文德角觝  
魚龍大醜辰火樹星橋上元節曠曠初日未央宮  
勅召千官燕喜同六卿九列百執事聯步隨肩丹

陛東須臾雉尾雲開處鏗鏘天樂諧韶護肅肅朝  
衣拜舞聲飄飄合殿香風度

皇帝曰咨汝庶臣明良喜起風何淳卽今海內際和  
樂萬年一德逢陽春鴻臚以次引登陛酌以金罍  
賜甘醴三爵油油上下交一時衍衍堂簾喜乃命  
賡歌繼典謨宸章紉縵雲漢敷羣工循職敢越俎  
發揚蹈厲歸都俞興慶昆明體非古栢梁鴻篇差  
可取曲終應有歲星才自天首唱諧鐘呂雍和凱  
豫不可忘序言御製尤煌煌金石鏤刻垂不朽  
頒賜珍比璆琳瑯



陛下聖神千萬世德四三王六五帝文如北斗仰昭  
回身在南雲獨畱滯白日再中黃河清不可再觀  
心屏營願將彤管書銘筆編作鈞天廣樂聲

送余佺廬副憲出撫江南四首

滔滔江漢流鬱鬱衡山麓靈鍾發奇表學績奮高  
躅巍科掇朝紳高議登諫牘卿省月旋升憲司霜  
已肅特簡在楓宸節旄古岳牧望協中外同憂  
厘東南獨蒿日慰當宁起色徵比屋舊俗變浮夸  
新政還淳樸臨岐策欲贈計日裝定趣雖微作頌  
才仁風君自穆

淮海惟揚州三吳古都會沃野幾千里財賦天下  
最其俗尚繁華其民多狡獪訟獄辭實繁輸將力  
已憊水旱况頻仍監門圖可繪井屋愁懸磬戈船  
方下瀨間左日凋疲望公如望歲幸值干戈偃恩  
綸次第沛征徭盡復除皇仁大無外願君垂棠  
陰千秋永勿拜

蘭芬竊同臭苔好忘異岑若水交自淡斷金情乃  
深動隨或鳴珮靜對時披襟酌酒互訓勸論文析  
古今將因捉談塵豈直盍朝簪偶俱得所倚離愁  
何可任人生貴知己相得在寸心兩懷無彼此何



高陽李相國召飲心遠堂  
會心寧在遠  
選地自成偏  
弼亮澄清日  
從容坐論  
會心寧在遠  
選地自成偏  
弼亮澄清日  
從容坐論  
會心寧在遠  
選地自成偏  
弼亮澄清日  
從容坐論

慮辰與參但望尺素書託意空中禽嘉聲慰傾聽  
重比雙南金  
燕京指吳會迢迢風水驛馬嘶人影亂旌旆漾白  
日握手送君行叮嚀語非一臨發還問訊整頓何  
年畢滄江控上游開府膺崇秩撫綏答宸眷旋  
歸期輔弼出銘方虎勳入領夔龍職相業調鼎鼐  
朋情固膠漆黃髮敦久要素心歸表率攀轅慎莫  
畱聽履猶應識

高陽李相國召飲心遠堂

會心寧在遠  
選地自成偏  
弼亮澄清日  
從容坐論

年午橋無別業京邸卽平泉白石南山粲清風北  
牖延琪花綠砌發玉樹就堦妍庇宇忘寒暑呈材  
各杞榘四時歸爨理萬類仰陶甄繞膝皆簪黻栖  
心屬簡編下朝還禮士開閣爲招賢吐哺趨函丈  
和羹接肆筵升堂真濫竊望道儼高堅莫副傳經  
意循循善誘前

嫁女

十載憐孤女良辰視曆書乘龍應可擬牽犬欲何  
如訓已嫻彤管風能挽鹿車施衿不忍遽含淚北  
堂虛



新闢書屋喜作四首

徑左門新闢堂陰築始成藥欄依戶出藤格借庭  
生室始容雙膝人堪擁百城下簾休浣日小坐腋  
風清

近市苦湫隘穿墉取靜便一庭塵已隔半榻午堪  
眠湘管施床架齋關禁刺傳吾廬真自愛長日足  
悠然

冗散思丘壑蕭閑在邸門側通堂宇邃稍避巷車  
喧有徑迎三益常時命一鐫不須尋別墅閉戶卽  
花源

無地施泉石隨時覓草花風簾嘗捲竹冰椀可浮  
瓜休假從三殿縱橫貯五車羲皇逢聖世高枕北  
牕餘

大兒南歸書示

道上年年換客衣秋風故里憶柴扉汝來真喜趨  
庭久此去終成鍛羽歸先隴松杉栽未密故園竹  
樹影猶稀好持門戶帷須下莫負分陰愛日暉

哭項翁山司馬

梓里追從二十年出嘗引領入隨肩儒臣乍典中  
樞重強記能令掌故傳霖雨竟虛三事望晨星無



詩存  
幾一鄉賢由來介性難投分知己平生特泣然

宋牧仲西山唱和詩屢疊東坡定惠院寓居

月夜偶出韻戲卽用原韻和之

古人興至不暇懶往往秉燭遊以夜漢臣休沐爲  
尋山十里鳴鞭五里下一過高梁初地深稍近離  
宮玉泉瀉源搜退谷亭可畱磴陟來青樹交亞香  
巖石路花雨中襍被窮幽宿屢借盧師法航無處  
尋山僧白飯不須謝言詩但挾過庭人期會忘歸  
尚書舍客邀同好競題鞭徑漸入佳如啖蔗相公  
遺業在元城門第可欽才可怕幸恕通門私淑人

近前莫放鈴下罵

駿馬歌

長安城中騎馬出千騎萬騎爭闖溢八駿已去紫  
燕無燕王臺在空蕭瑟衆中有馬迥出羣筋骨超  
騰山翠律梢垂髮擗時一嘶踣蹄未動氣已馳純  
銀鞵鞞錦障泥九衢蹴踏香塵飛歸來不肯共凡  
阜駒跳長鳴無不好嚙膝難忘千里心騰驤肯向  
鹽車老世無赭白與飛黃踣鐵堅蹄踐雪霜不分  
功成憑惠養願陪天仗扈君王

種花



鑿坏施堦磴庭砌亦已平分檐不數步爲臺一簣  
成雨露無頗澤蜂蝶時乍清買花紛在眼移根歷  
亂生雜吐瑣細苞各鬪紅紫英藉茲灌溉力及時  
揚光榮未能從老圃終是憶柴荆聊用慰目前遣  
寄心與情

洗象行

宣武門前黃旗出沿路千人萬人碎金鼓喧闐巨  
象來赤日黃埃岸爲坼初疑連峯壓江開三十六  
象次第排昂頭掉鼻驅風雷黑雲動地山崩摧玉  
河六月水猶溢澄波漫漫玻璃色乍沒已破黛影

青旋浮直暎鰲身黑蹴踏龍湫勢欲移翻騰蛟窟  
深難測低昂鼓浪脊屢蹲噴欲生濤鼻爲力象奴  
騎象捷有神撇波蹠蹠無不爲攬身翹足意自得  
蠻人與畜兩相宜此象日南產臯澤大暑自浴滇  
池碧聖德及遠百獸馴重譯貢之來紫陌受俸亦  
得比朝官庇以大廨幪錦鞍將軍賜號千夫長殿  
門立仗五雲端回頭寄語向身毒此問殊樂不思  
蜀太平 天子千萬年年來向天河浴

萬柳堂公餞馮相國適以事阻遙和原韻

堂前垂柳復垂楊萬樹新秋未有霜別墅還同履



道宅乞歸更闢午橋莊十年戡定謀謨密百世昇  
平坐論長 帝眷特優黃閣老寵行應見出天章

其二

絲綸異數許歸閑花木平泉手自刪啓沃十年勞  
虎拜遲迴此日戀 龍顏安車詔遣行人護祖帳  
爭看太傅還杖履獨慙虛接席津亭悵望隔銀灣  
送蔣莘田督糧粵東

嶺外新除毒螫年仗公持節爲旬宣昌言檻是封  
章折歷試帷從按部褰民力東南應已竭仁聲海  
徼頓能傳單車會奏兒寬績課最兼優撫字賢

送汪舟次檢討奉使琉球

王會古有極化域今無外南窮廩竹鄉東際扶桑  
界驛路直闔天邦名著隋代貢修臣職詳詔出王  
言大封崇玉冊頒典重金繒賚恩信藉宣揚精誠  
孚簡在公才九殿英儀表千官最品服稱緋衣腰  
圍宜玉帶出郊持使節餞野發征旆仗輟楓宸班  
帆指若木掛槎影漾日移花裙望塵拜龍函奉絲  
綸鷁首飄芝蓋國體示鮫人 皇威恬水怪樓憑  
結蜃成石立分鼇戴鳥樹直如薺山城浮若芥神  
異紀詩篇俶詭收圖畫天闕指星榆雲章垂露薤



堯堦教已敷宣室歸仍對已見舞羽千方期調鼎  
鼎還志十洲經瑰奇擅千載

宛平王相國重新育嬰堂志喜

皇天好生每惡殺聖人之世無天扎生兒不鬻代  
哺之都門東南建香刹中堂差峩周以廬乳媪十  
百相聚居寒冰隘巷競羅致裹抱血浣襟與祛呱  
呱一聲不再續拋擲路傍額爲蹙是何夫婦掉臂  
歸傷心不顧親骨肉人生自不飽舖糜安能兩相  
存活爲不獨親親不獨子吾徒愴惻多仁慈給之  
乳哺酬以傭抱出一一含咲容蟲蟻亦知生處樂

輔相帝德成時雍事久人非或中情積金按籍恣  
侵破人心奉行不如初旁觀太息袖手坐相公暇  
日肩輿來鼓舞士庶登春臺修廢舉墜無不力見  
者踴躍心爲開分司綜理各有人輦金出力如響  
臻奉揚 天子廣德意拯育四海活萬民蠕蠕蠢  
動罔不獲匹夫匹婦被堯澤此堂巍巍宇翼翼設  
以規條勒用石推行郡國澤不頗踵而行之巨人

蹠

同譜讌集

彈冠始幸際昌時紫陌騏驎蹠蹠遲二十年來星



每聚九重闕下日相隨從容退食經過暇雜坐忘  
形醒醉宜罇酒莫辭高會數燈前盡有鬢如絲

中秋

此夜千門月爭迎瓜果秋玉隨清露下金湧碧波  
流烏鵲瞻雙闕歌鐘沸五侯霓裳天上曲疑侍廣  
陵遊

九日登毘盧閣

沆碭秋郊風物清岿堯傑閣俯神京檻凭萬井疎  
煙合簾捲千峯積翠明祇樹烏啼寒葉下香臺客  
散晚鐘聲登高歲歲龍沙會馬射虛慙作賦名

月下看菊

小院栽花密高垣見月遲色黃開未綻影白照應  
知滅燭娟娟坐啣杯冉冉移漸看清魄墮晨露想  
東籬

入詹事署

試吏十年違虎觀改官今日傍龍樓曾無秋實涓  
埃補敢作春華爛熳浮出閣宮僚應預簡素餐朝  
列恐貽羞自惟羽翼非商老簪黻恩隆未許抽

殿試武闈恭紀

聖代隆文治仍看纘武功應圖來駿馬占夢叶非



熊撫髀思名將臨軒達 聖聰士當三選後人集  
一庭中竹箭徵輪遠風雲徑路通論兵紛奏牘展  
技試瑯弓會見孫吳應縣知頗牧同但令歸駕馭  
豈是乏英雄碧落凝丹靄彤墀映彩虹飛纓迎旭  
日緩帶信柔風取次呈羣策從容厯 睿衷材應  
麟閣選詩奏兔置工薄海看無戰君王重詰戎泰  
階方共慶盛事荷遭逢

郊宮齋宿

改秩重陪祀先庚儼致齋萬年方配 祖三日是  
燔柴地入園丘肅官聯庶尹諧紫壇烟霧裏瑤月

滿天街

南郊陪祀恭紀二十韻

敕寧方大定昭假預明禋壇宇卿雲覆天街燎火  
陳千官迎日至萬乘與風臻紫陌清嚴蹕元郊卜  
上辛禮初陪九獻樂果叶三神臭達升膏血殺嘉  
列棋榛無言昭對越一德感精純備物情難稱升  
中禮必親化侔颺頌代恩逮駿奔人得覩郊宮器  
齊紆命服紳在公榮有事夙夜協同寅咫尺瞻  
龍袞趨躡陟 帝宸熙朝占泰運子月轉洪鈞葭  
管方迴律菁茅盡率賓太平堪黼黻元會值桓信



詩存  
于羽千年象共球四海春自茲清晏洽相與蕩平  
遵宣室釐常受明堂政益新天庥承游至 帝德  
被無垠詞賦甘泉麗誰應繼漢臣

雪後望西山二首

雪色映千門玲瓏望宮闕馬上見西山疑對峩崹  
月

不作袁安臥貪看雪裏山千峯入圖畫好手是荆  
關

冬夜旅懷二首

永夜漏聲稀踈櫺殘雪映燈暗酒醒初旅愁茲夕

併

寒逼重衾薄霜欺爐火微清宵渾不寐一雁向南  
飛

元日賜宴

玉階鵷鷺集元日御筵開紫殿雲如蓋朱樓雪似  
梅仙盃承露酌天樂雜風來燕豫懽何極承恩旣  
醉回

送徐敬菴僉都開府山左四首

泰岱天下宗節鉞百僚仰簡在出西臺由來識忠  
讜特達 聖主知深眷巖廊上奉茲帶礪言秉此



旌旄往上答顧睠榮兼期副弘獎青齊望雲霓願  
言趣征鞅

齊俗資表率吏治貴激揚矧承流波靡姑息鮮循  
良豪右積蠹蠹民隱多摧傷拔薤有驅除端本賴  
紀綱飲水矢素心白簡肅秋霜皦皦勵清節史冊  
名逾光

弘綱旣峻肅敷化尚柔寬佩韋異束濕德教取勝  
殘急促小絃絕從容臥理安政惟綜大體意在迴  
狂瀾自許致稷高詎肯師申韓持此佐 天子羽  
儀升朝端

自余方弱歲載筆陪藝圃及此通籍遊每共聞鷄  
舞甘貧素業同勵志心期許紛華旣非悅名節慎  
所取臨岐戀行鑣祖道攀郊樹大業佇雲霄鴻名  
藉鈞輔

禁中 時與脩平定三逆方畧

禁中春色晝透迤載筆承恩出每遲萬里車書通  
燠道十年瘴霧淨滇池已知廟筭宣威遠獨喜神  
功不殺奇 睿畧高深元蠡測尚方給札媿虛糜  
十哀詩輓施愚山侍讀

早年宦轍半爲郎白首承恩貢玉堂虎觀諸儒誰



得似一時枚馬有兼長  
每談忠孝涕霑巾摯性如君見古人不朽生平多  
大節它年豈特傳儒臣  
清風遍歷宦遊年塵甌懸魚意洒然身後圖書三  
百卷更無長物件青氊  
七子詩傳重國門暮年詞賦益騰騫建安風調開  
元格身後何人得細論  
傳經齊魯憶春風稷下誰凭講席重山色獨憐華  
不注清秋依舊削芙蓉  
臨江江上古洪州遺愛羊公片石留祇今閭皂山

頭月還照江聲鳴咽流

前年擁傳出天中嵩少題名處處逢三十六峯青  
不斷不知笙雀駐何峯

一官清署老支離每斷炊烟飯作糜家遠更無人  
侍疾遲來已是夢楹時

塾角林宗見典型顧厨屈指已晨星天涯大有窮  
交泪灑向秋風濕敬亭

蓬萊珂散侍臣裾苑樹宮雲下直初腹痛玉河橋  
畔過不教三步已回車

會稽行贈吳叢山水部



會稽南鎮青芊綿宛委玉簡三千年耶溪蘭渚相  
洞沿巖壑秀絕東南天東南闕閱連雲起竹箭南  
金誰比儼延陵遙胄世多賢公侯之後復厥始中  
間水部特清發文采風流世希絕欽寄歷落開襟  
期皎若青天攬明月奮身卽自致青冥排風會見  
豐毛翮幾年簪筆陪石渠旋移粉署含鷄舌君家  
門第邨可當制府南天叔父行斧鉞已看清瘴霧  
功名應許重旂常小阮後來復繼起聲名籍籍尚  
書郎我家舊是姚江派江水盈盈一衣帶萬里天  
涯實比鄰戚誼梓情看氣槩京邸題詩二月時因

君忽起望鄉思永和山水今無恙被襖蘭亭好未  
遲

浴麟歌爲張南溟京兆賦

高門七葉何嶙峋啼聲試聽天上麟主人黑頭張  
京兆懷中繡襖衛璧人京兆當年侍青瑣直聲慷  
慨中朝播封事回天隱德多朝上昌言夕報可災  
黎婦女載以車輦販轉鬻無主家駟僮居奇道不  
絕被驅豈異豚與豸復有流亾就溝壑挈老提兒  
足前却萬口饑號天爲低一言侃切恩已博破柱  
威名解網德贖歸纍纍脫其籍更下廩粟舖斯民



歡呼再生王者澤問誰爲叩天門開湛恩汪濊遍  
九垓略賣得歸餓者活萬人額手歡如雷由來盛  
德必昌後三槐之王五桂竇各門果見育寧馨釋  
老送來親抱授昨年京兆行膠宮放馬牧豕瓦礫  
充攬轡澄清首入告講堂鱣席增隆崑敦詩說禮  
教百世式穀象賢美應濟依砌方看一樹蘭隨肩  
會驗連枝棣轉瞬行當與戶齊靈光賦筆衆應知  
斑斕舞膝堪爭美五十生兒未訝遲

瓶中芍藥二首

萬藥千花錦作堆燕中芍藥說豐臺分攜幾朶湘

簾下粉白嫣紅一樣開

看遍名花到牡丹將離還得殿春殘玉盤金帶都  
各種斐几銅瓶珍重看

午口與子湘弟同賦

帝京午節逢佳勝兄弟它鄉共酒尊艷艷榴花元  
照眼青青艾葉故當門霓旌南苑移舟晚黛色西  
山過雨痕忽憶錢塘喧競渡踏潮鼉鼓繡旗翻

送張又南廷尉省侍還秦中二首

省侍板輿行安西萬里營登堂爲定遠繞膝是廷  
平玉帳牙旗重萱闈翟弗輕過庭俱八座家慶羨



詩在  
恩榮  
勲業麒麟重綸章烏鳥情侯封推國老子舍拜朝  
卿詩補南陔句歌調仲夏笙鼎鐘方矍鑠祭戟正  
崢嶸

送宋牧仲分巡潞河

五花驄馬金連錢朱旗獵獵鏡吹喧離筵四月橫  
門道如雪楊花覆錦韉千騎駸駸向何處畿南鎖  
鑰需才賢薊丘孤竹今馮翊璽書三輔勞旬宣師  
門忝竊淵源誼君家舊事猶能識王父前朝名大  
夫按部褰帷曾此地相國功名復後來異代甘棠

歌菱慙旋膺節鉞陟台司十餘年間登兩制丙魏  
姚宋相肩隨鐘鼎旂常翻手致君今繼之豈偶然  
四世三公或天意車前父老已龐眉異事驚傳尚  
垂淚東望盤山翠色平蜿蜒百里接神京都亭埋  
輪豪右歛松下著屐山僧迎久識鷄林重詞賦更  
看鵬鶚排青冥當年私淑生雖晚世講膺門意倍  
親期公他日登台輔接武雲霄豈異人

瀛臺侍直

瀛洲曲檻敬崇臺帳殿周迴曉鏡開宮是九成無  
暑到樓真五色見雲來垂衣肅穆瞻行幄簪筆聯



言在  
翻陟上台使節歸朝還侍從小臣歷試本凡材

其二

鬱葱玉樹映朱樓太液芳波淨不流石磴參差環  
豹尾牙檣溶漾引龍舟鏡中臺殿晴逾碧檻外峯  
巒翠欲浮扈蹕真疑三島近無煩羽客詫瀛洲

家山寄茗筍至

茶槍出岍竹孫長筍裹封題遠寄將憶得故園風  
景好榆花飄盡棟花香

蒲萄

蒲萄上架碧含煙孌孌垂垂四月天好待晶盤堆

馬乳只應荔子鬪新鮮

送陳鄰公少叅之濟東

枯栢無撓枝輪囷無直理夙昔秉微尚由來重知  
已覲君榷柟材託契申蘭茝家學盛文章詞源窺  
根柢腹笥貯經籍清談間斐奩鞭扶齊梁塵馳驟  
開元軌竭來奉璽書觀察向東濟齊魯彫瘵餘撫  
事堪流涕郡國急誅求令長事鞭撻郵傳穴蠹癰  
爬剔苦窳嵒至尊憂黎元藉子抹瘡痂此行布  
嘉惠聲名徹宸扆相送橫門道芳草正靡靡芊綿  
花絮飛逶迤巒岫紫樹攬離思繁帳飲驪駒起憶



子先大夫遺愛吳江汜俎豆儼桐鄉尸祝今畏壘  
努力崇令名前徽庶可企

黃母王孺人苦節詩

烈芳出委灰繁會生絕絃緬彼貞松節孤根託重  
淵時與霜霰集斤斧日相煎千年梁棟材黛色能  
叅天黃母厲清撻辛苦儒門賢三九稱未亾堂上  
復棄捐下有黃口兒呱呱無倚延持戶一健婦豐  
饌供賓筵老姑沉痾起諸子誦讀便勃谿風自掃  
閨範共稱傳年今已古稀夔粟未敢前介言乞長  
者豈爲華腴妍寄謝百歲客幾人象黎川

送孫予立編修使安南

玉河柳色擁驪駒獵獵朱旂曉渡瀘百粵已看來  
翡翠九真應自貢珊瑚荒城雨過枕榔暗古埃春  
濶格磔呼四海車書今日事歸來王會有新圖

大司寇劉端敏公崇祀鄉賢恭賦

元公挺朝楨青冥刷羽翮梧垣蚤知名楓宸多建  
白退食吟素絲憂國攄碩畫一麾領外臺楚豫兼  
敷歷漢南甘棠歌峴首羊公石游陟卿貳崇公望  
朝野識周茲九卿班遂曳尚書舄位高益謙謹拜  
手久怵惕僉譽待秉鈞大星俄隕櫪易名哀榮備



復壙 皇衷惜公論沒逾瑩鄉評久未射几筵父  
子竝菜奠春秋釋緬昔驅使車西江共于役予濫  
生徒竽公寄旬宣職惟時值艱危伏莽寇充斥甌  
粵燧塵暗芻輓軍興迫流涕撫瘡痍凋敝振長策  
此邦有遺愛善政予日擊尚闕桐鄉祠徒虛寇公  
借俎豆宗儒事去思畏壘跡盛典宜竝光陳詩備  
采撫

李鄴園制臺晉大司馬賦賀

牙旗高擁越溪還詔領中樞曉入班曳履上公趨  
魏闕勒銘片石壓胥山兩朝身許麒麟畫萬里烽

清虎豹閒尊俎從容還坐鎮會看洗甲淨邊關

其二

公初司理金華又巡鹽兩浙最後有總督之命

法曜初臨南斗傍平反父老記于張仍煩繡斧巡  
鹽筴遂捧兵符下室皇赤羽籌邊頻午夜皂囊封  
事有秋霜廿年於越三持節總爲窮簷鬢已蒼

其三

東南幕府賜專征閩徼潢池乍弄兵鈴閣何妨揮  
羽扇京觀蚤已築蛟鯨安危實繫中朝望鎖鑰寧  
論萬里城回首兩江爭戰壘十年銷甲盡春耕

其四



節鉞從來領外臺，袞衣可更陟中台。殊恩獨柄元  
樞府，時論還歸宰相才。屬國降王驚姓氏，儒生東  
閣許追陪。聖朝正喜銷兵日，霖雨須令遍八垓。

沈繹堂前輩六秩詩以祝之

松喬良渺茫，彭聃亦偶爾。仁者必能壽，斯言有至  
理。先生瑚璉器，致身夔龍比。甲第句臚傳，日下卿  
雲鬣。敷歷踐外臺，嵩洛迎旌棨。再持三輔節，褰帷  
潞河汜。所至遺愛聞，口碑籍人耳。洎今領宮僚，建  
白一何偉。往者新例行，流人皆遠徙。青海實窮荒，  
絕北三千里。十往幸一全，羈魂塞燐紫。公首抗昌

言茲事當昭洒祝網，聖主恩將順。臣職美廷詰，  
乃再三臣議。屹不改天聽，爲之回至誠。感玉几遇  
事，每不阿一柱中流砥。卓哉仁者勇，欽此蓋代氣。  
卽之復可親，和如飲醇醴。右軍豈書家，文章亦小  
技。古有社稷臣，如公洵可擬。他年黃髮番，上殿曳  
革履。祝嘏非諛辭，天道有如此。詰嗣已騰騫，鳳毛  
行踵趾。

早朝侍直

玉卮金鋪麗建章，紫宸鵷鷺儼成行。綵鞭聲散芙  
蓉闕，旭日光浮翡翠牀。星弁熒熒天北極，朱旗肅



言在  
肅殿東廂微臣載筆龍顏近佳氣氤氳晝凝上香聲

長歌行贈張真人

畱侯辟穀從赤松果老中條騎茅龍真人之後世  
乃大累朝賜號榮褒封龍虎山深闕紫府秀拔萬  
朶青芙蓉瓊芝瑤艸晝翦蔚霓旂絳節行相逢美  
君不愧真人裔標雲玉樹煙霞氣丹篆錯落蛟螭  
蟠青虵森亾魍魎避看君豈是山澤癯富貴神僊  
兩兼致竭來謁 帝明光殿有詔黃門數引見班  
行禮數絕羣寮御厨八珍大官讌方朔射覆天顏  
開舍人投壺玉女粲赤章夜半叩天關膚寸崇朝

灑芳甸豐隆屏翳紛後先喫酒呪龍何足羨却憶  
當年驅使車我持玉杖凌清都此時君纔十四五  
已詫僊骨常人殊今年相見長安邸長身玉立澄  
雙瞳鸞章鳳姿世爭覩荏苒老大驚吾徒屈指還  
山秋已徂薊門風葉鴻雁初何須更擢秋江鱸鶴  
背藥風恣所如

送張運青先生出守兗州

岷山巖嶽巴川駛削壁千尋映江水山川蟠鬱偉  
人生歷落嶽嵒寄見之子起家初讀中秘書皎如初  
日芙蓉舒異才及時貴歷試明刑典禮推訐謨一



麾出守金閫去夾輻雙鹿隨車雨金閫繁劇古難  
馴十日風行政已新發摘蚤知豪右歛爬搔會見  
風俗醇公來何暮去何速攀轅父老含悲辛卽今  
特簡濟河守襪被單車趣東首二東杼軸愁遺黎  
探丸投鋸毗俗疲君行定知有奇政按部且晚流  
風移甌塵但飲泗上水官厨十口井鹽藿奮髯抵  
几齊兒走解刀買犢耕農嬉渡虎却蝗何足異鳳  
凰神雀當來儀介節久令吾黨重循良異日史書  
垂岷山高何巉巉巴水清何泚泚使君清名滿人  
耳千載孤標有如此

景山侍讌

時賜讌外蕃貢使

離宮別殿駐龍旂禁樹和煙鎖翠微安息條支元  
入貢降王侍子總來歸御厨絲絡分駝餽天仗星  
羅列飲飛塵跡自憐難可到回翔竊喜奉恩輝

送鹽亭令

劍外梓川萬里行都亭柳色引雙旌雲開曲曲巴  
江宇樹暗山山杜宇聲飛鳥影來千嶂曉彈琴花  
擁一溪明射洪遺跡今存否何限公餘懷古情  
知彩西安將軍凱旋獻紅綠鸚鵡各一與陳說巖

王慎菴兩學士同賦



七萃橐弓日三驅振旅時碧鷄通使節朱鷺奏鏡  
吹琛賈陳王會共球集赤墀好音懷絕域珍羽貢  
殊姿迢遞來京洛艱難別隴坻翠衿原自異頰翼  
更標奇對舞僊人掌分栖太液池朱霞爛披錦碧  
色弄清漪苞采鸞皇匹縹精翡翠疑金眸雙炯爍  
緝趾各森纒乍入青叢暗驚翻紅藥遲風霜辭繡  
嶺雨露託皇慈竝立雕籠窄交飛厥殿宜苑雲  
晴冉冉禁柳綠垂垂啄葉寒珠網啣花上玳榴含  
情宮女避學語侍臣知調舌嬌黃鳥清歌教雪兒  
呼名巧自應照鏡漫愁思撫翼憐明慧依人訴別

離微禽亦何幸雙寄上林枝

送少宰杜肇餘親家巡視粵閩歌

朔風十月吹枯樹燕山雪片大如鷺上公奉詔歷  
海疆祖行供張城西路錦帶麒麟七尺軀高牙大  
旆八騶車萬里之行自此始南踰五嶺窮蒼梧回  
轅八閩汀漳遠荔支花發鈞駟呼問公此行胡爲  
爾海濱甌脫幾千里自從島嶼腥蛟鯨蠶戶居民  
皆內徙築屯列障十餘年千邨萬竈空荆杞卽今  
滄海波不揚揮斥八極供鞭撻越裳新見白雉來  
滇洱無煩碧鷄使還聞宵旰軫軫黎甿詔戢流攜撫



瘡痂剗端特遣重臣行勞來旬宣報 天子嶺南  
土俗吾舊諳使車前歲褰帷瞻親見海墺原沃壤  
羸蛤蜃蚌饒魚鹽兜鍪整雜耕勢不便往往豪右愁  
隱占比來雁戶盡復業須令陰雨膏窮簷車騎過  
家逢上壽嘖嘖駢填路傍口除道負弩爭郊迎綵  
衣萱堂介春酒美公此行良壯圖大誼君親兩無  
負離筵醉起笳鼓鳴沙雪紛紛遶旆旌計日歸朝  
待調鼎霞關庾嶺好遶行

大司寇魏環溪先生見示紀恩詩次韻奉和

其一 戊午歲除 賜紫貂披領朝服一襲

除歲光風靄曙暉綺貂偏稱上公衣自天題處絲  
綸重當殿擎來拜舞歸避帳直原同汲黯畏人清  
自比胡威 聖朝衮職無煩補獨媿陽春屬和微  
其二 已未奏事懋勤殿 賜御書三幅

合殿春風曉闌班西臺封事近龍顏頻遲晝漏承  
溫語雙捧 天章出御頒紉縵卿雲垂五岳昭回  
銀漢接三山圖球琬琰寧堪侶翹首恩光霄漢間  
其三 癸亥巡視畿輔謁 駕行在賜兔隻

元公分陝已風移如水臣心 聖主知攬轡棠陰  
迎露冕封章黍谷藹春曦朝端會儼登三事輿頌



還聞美十奇行在承恩權兔首矢音應獻卷阿詩  
其四 癸亥 名見乾清門問病狀賜人參

何須扁跗疾能攻藥餌扶衰軫 聖衷黃帕封題  
三殿北紫侵擎出五雲東佳辰喜近陽重九老健  
還如日再中正憶螭頭躬侍從親聆 天語渥臣  
工 是日遠適侍班

同年讌集用謝靈運擬鄴中集詩體八首

自去冬抱疴沉綿一載幸得更生同籍兄  
弟合尊爲余起病余令優人演邯鄲夢是  
日也宮徵屢移竹肉遞奏悲懼幻影哀樂

更端惜噩夢之誰醒悵炊梁之易熟蓋感  
慨係之矣旣念吾徒聚散何常良會能幾  
不可無詩以識盛雅而旅人易愁音多激  
楚述今感往情見乎辭時甲子仲冬日也  
少宗伯巖存庵

儀鳳巢阿閣振鷺翔楓宸熙朝盛文彥羣賢悉響  
臻巖公世巨儒對策究天人摘辭軌正始疎散蘊  
大真沉飲詎埋照晚達勝積薪金門陸沈久秩宗  
嘉命新顛我同袍友龍蠖殊屈伸茲夕展懽讌醺  
醪澄清尊中飲悵古昔叙意含悲辛離合會有時



刺促休重陳且盡今日娛角觝方紛綸

黃門王派夫

高高天下中伊洛交流滙名區饒異材偉彼瑚璉  
器茂宰循聲賢赤縣飛鳧異致身青瑣垣入侍金  
華陛皇塗諒清晏皂囊屢封事論史究三長弊吏  
嚴六計休沐直餘閒羣公敞高會惟時杪冬交朔  
吹日夕厲層冰鬱峩峩飛雪千里至吾徒愛景光  
勗此歲寒意

宮贊胡朴崖

原獸走索羣離鴻念儔侶啾啾食野蒿噉噉鳴寒

渚况我心所親臭味芳蘅杜胡君澹蕩姿入世或  
齟齬淵源闕道奧深心辨毫楮蚤侍金馬門晚陟  
銅龍廡蘭友此攀追羣賢盍簪聚嘉肴克圓方屈  
卮酌芳醕清讌窮曠旭詼諧罕抵忤濡翰申素心  
同調諒相許

祭酒李貞孟

李侯侷儻士小節或脫略意氣薄浮雲文采麗丹  
蘄蚤歲對赤墀層霄騫鸞鷲回翔石渠步抵柱克  
宗角鸞掖豈滯留鱸堂遂騰蹕衆賢慶茅茹多士  
驚木鐸繾綣故人心休暇命栝酌爲樂屢更端緝



御紛交錯三爵顏已醅  
雜談間諧謔相於意良厚  
傾軀媿優渥含意余未伸  
遙情美丘壑

少司馬熊蔚懷

余昔乘傳車南州祇于役  
邇迴章江駛崢嶸匡阜  
碧攬轡鄭公鄉披幃子雲宅  
開顏待發蒙傾心飲  
醇醪竭來客京華推挽互相藉  
君行曳革履予還  
侍交戟奉茲曲晏娛寒宵華館闕  
羽觴懽夜闌蘭  
膏耀東壁倦鳥懷舊林惆悵志未適  
何當首歸路  
欣然謝羈勒

銀臺袁密山

粵嶠暗烟塵蒼梧蒸霧瘴  
惟昔百六遭西南愁轉  
餉袁公矢精誠禿節書生壯  
國威鬯遐荒氛昏旋  
掃蕩 皇眷紆孤忠心好非外  
獎崇班月卿亞高  
議銀臺上夙誼諧塤篥新懽陪  
履杖聽樂詎云疲  
撫懷增邑快鐘鼎公當銘烟霞  
余獨往願言敦久  
要音塵慰滂沱

黃門車鶴田

遨遊美茲夕列坐蔭華堂  
臚臚和芍醬益齊浮玉  
觴卜晝繼以夜銀鐙熹寒光  
趙瑟旣要眇秦箏亦  
慨慷黃門實英彥吐辭儷蘭芳  
庭前兩玉樹皎皎



何清揚念昔南皮會投轄秦淮旁  
鶴田僑居白門  
余曾留數晨夕  
今復燕市飲未厭酒人狂夜深步欄楹仰睇河無  
梁離雁逝南適良會詎能常

侍御嚴柱峯

對酒且勿誼慷慨叙平生少小共里閭硯席為弟  
兄並總金門轡鳳沼厠羣英余還棲故枝君驅驄  
馬行浮沉二十載鬢髮各已星曰余嬰疾病綢繆  
感故情投閒夙有慕岐路仍屏營卮酒峙五嶽突  
兀詎能平仰媿班馬業俯慙邴疏名羨彼高空羽  
肅肅嘆青冥



